

Inatsisartut Suleriaasiata allanngortinneqarnissaanik siunnersuut.

(Inatsisartut Siulittaasoqarfiat)

**Saqqummiussissut
Siullermeerinnineq**

Siulittaasoqarfik sinnerlugu matumuuna Inatsisartut Suleriaasiata allanngortinneqarnissaanik siunnersuut saqqummiutissavara.

Suleriaaserput kingulleq 2010-meersuuvoq, tassani suleriaatsip siuliata 1999-imeersup 2010 tikillugu allannguutigisarsimasai tamarnik katersorneqarnerisigut taamatullu aamma Inatsisartut Naalakkersuisullu pillugit inatsimmi nutaami aalajangersakkat ilaasa suleriaatsimut nuunneqarnerisigut sukumiisumik nutarterisoqarluni.

Suleriaatsikkut nutaakkut taamatutaaq ataatsimiititaliqarnikkut aaqqissuussaaneq eqqarsaatigalugu malittarisassanik nutaanik aalajangersaasoqarpoq, ilaatigut aningaasaqarnermut ataatsimiititaliamut kukkukersiuiinermullu ataatsimiititaliamut ilaasortat Inatsisartut upernaakkut ataatsimiinneranni toqqarneqartalerlutik.

Siulittaasoqarfiup suleriaatsimut allannguutissatut siunnersuutikkut matumuuna ataatsimiititaliaqarnikkut aaqqissuussaaneq eqqarsaatigalugu suleriaqqinnissamini kissaatigaa ataatsimiititaliat assi-gingitsut kattunneqarsinnaanerannik periarfissiisoqarnissaa.

Tamatumunnga tunngaviuvoq ataatsimiititaliat sulinerisa nukittorsarneqarnissaanik kissaateqarneq, ataatsimiititaliat arlallit qaleriinnik suliassaqartarnerat pinngitsoortinniarlugu suliassaqarfiisalu erseqqissarneqarnissaat siunertaralugu, taamatullu aamma ataatsimiititaliat ataatsimiittarneri anga-lasarnerilu pitsaanerumik ingerlanneqartalerniassammata, kiisalu ataatsimiititalianik annertunerusunik akisussaaffilinnik nukittunerusumillu tunngavissalinnik pilersitsisoqarsinnaalerniassammata.

Ataatsimiititaliat suliassaqarfiisalu taamatut nukittorsarniarneqarneranni eqqarsaatigineqarsinnaammata ataatsimiititaliat ilaanni ilaasortat suliassaasa annertunerulernerat nalilerneqarpoq pisut ilaanni pisariaqartarsinnaasoq ataatsimiititaliat taakku pissarsiviusumik ullumikkut tallimanik ilaasortarsinnaasaminnik amerlanerusunik ilaasortaqaartinneqarsinnaanerat.

Taamaattumik aamma siunnersuut manna tunngaveqarpoq naatsorsuutigineqarmat ataatsimiititaliaqarnikkut aaqqissuussaaneq allanngortinneqarnera Inatsisartunut ilaasortanut ataasiakkaanut ataatsimiititalianut ikinnerusunut suliassaqarnerusunullu ilaasortaaffeqalernermik.

Taamaattumik siunnersuutikkut periarfissinniarneqarpoq ataatsimiititaliat pineqartut tallimanik arfi-neq-marlunnilluunniit ilaasortaqaarsinnaanissaat.

Siulittaasoqarfiup neriuutigaa ataatsimiititaliaqarnikkut aaqqissuussaaneq allanngortitsineq manna ataatsimiinneq manna aallartiffigalugu atuutilereersinnaassasoq.

Taamatut naatsumik oqaaseqarlunga inatsisissatut siunnersuut Inatsisartunut oqaluuserisassanngortippara ilassilluarneqarnissaa neriuutigalugu.